



Суд Босне и Херцеговине
Суд Босне и Херцеговине

Broj: S1 3 U 027081 18 U

Datum: 28.05.2019. godine

Sud Bosne i Hercegovine u Sarajevu, u vijeću za upravne sporove sastavljenom od sudija Jadranke Brenjo, kao predsjednika vijeća, Efraima Čosića i Ljiljane Lalović, kao članova vijeća, uz sudjelovanje Stanke Čeklić, kao zapisničara u upravnom sporu tužiteljice , iz G. Rainci, ulica , protiv rješenja broj: UP1 03-1-37-1-204-2/17 EM od 09.11.2017. godine, tužene Agencije za zaštitu ličnih podataka u Bosni i Hercegovini, u upravnoj stvari zaštite ličnih podataka, na nejavnoj sjednici održanoj dana 28.05.2019. godine, donio je sljedeći,

P R E S U D U

Tužba se odbija.

O b r a z l o ž e n j e

Osporenim rješenjem broj: UP1 03-1-37-1-204-2/17 EM od 09.11.2017. godine, tužene Agencije za zaštitu ličnih podataka u Bosni i Hercegovini, odbijen je kao neosnovan prigovor tužiteljice, protiv Porezne uprave Federacije BiH – Kantonalnog poreznog ureda Tuzla, Porezna ispostava Tuzla, zbog nezakonitog davanja ličnih podataka.

Blagovremeno podnesenom tužbom, tužiteljica je osporila pravilnost rješenja tužene navodeći da je po saznanju da je Porezna uprava FBiH, Kantonalni porezni ured Tuzla; aktom broj: 13-3/1-49-3470 od 19.04.2017. godine dostavila Pravobranilaštvu RS podatak o njenom zaposlenju, podnijela prigovor Agenciji za zaštitu ličnih podataka u BiH. Prigovor temelji na odredbi člana 3. stav 1. tačka 4. Zakona o Poreznoj upravi FBiH, kao i tumačenju, te uputstvu o načinu primjene člana 3. 1. tačka 4. Zakona o Poreznoj upravi Federacije BiH, Federalnog ministarstva finansija Sarajevo u aktima broj: 05-14-2-1540/16-1 od 17.03.2016. godine. Naime, citiranim odredbom jasno je definisan pojam porezne tajne, kao i to kome se porezne informacije i podaci koji predstavljaju poreznu tajnu mogu dati, pa je tako određeno da su to organi nadležni za preduzimanje mjera i aktivnosti sa ciljem utvrđivanja poreznih obaveza, odgovornosti za porezne prekršaje i poreska krivična djela, stranim poreznim vlastima u skladu sa međunarodnim ugovorima, drugim licima uz pisani pristanak poreskog obveznika, Vladi FBiH, Parlamentu FBiH, Vladi kantona, Skupštini kantona, Gradskoj skupštini, općinskom načelnik, vijeću i svim federalnim organima uprave i upravnim organizacijama. Imajući u vidu naprijed navedene odredbe, smatra da je tuženi organ

postupajući suprotno zakonu (odredbama koje se odnose na poreksu tajnu), dostavio podatak o zaposlenju tužiteljice Pravobranilaštvu RS, jer se radi o ličnom podatku za koji nikada nije dala svoj pristanak da se isti može proslijediti Pravobranilaštvu RS-a, a što je u suprotnosti i sa Mišljenjem federalnog ministarstva finansija u aktu od 17.03.2016. godine. Slijedom navedenog, predlaže da sud tužbu uvaži, poništi rješenje broj: UP1 03-1-37-1-204-2/17 EM od 09.11.2017. godine i predmet vrati na ponovno odlučivanje.

U odgovoru na tužbu tužena je predložila da se tužba, kao neosnovana, odbije, ostajući kod razloga datih u obrazloženju osporenog akta.

Ovaj sud je ispitao pravilnost i zakonitost osporenog akta tuženog u granicama odredbe člana 35. Zakona o upravnim sporovima BiH („Službeni glasnik BiH“, broj 19/02 do 74/10), pa je odlučio kao u dispozitivu ove presude iz sljedećih razloga.

Iz stanja spisa, kao i obrazloženja osporenog rješenja proizlazi, da je tužena odlučujući o prigovoru podnesenom protiv Porezne uprave Federacije BiH, Kantonalnog poreznog ureda Tuzla, Porezna ispostava Tuzla, u predmetu obrade ličnih podataka, odnosno, pribavljanju podataka o zaposlenju tužiteljice, prigovor odbila kao neosnovan, pozivajući se na odredbe člana 17. stav 2. Zakona o zaštiti ličnih podataka, nalazeći da kontrolor može davati lične podatke na korištenje treće strani na osnovu pisanog zahtjeva treće strane, ako je to potrebno radi obavljanja poslova u okviru zakonom utvrđene nadležnosti treće strane ili ostvarivanja zakonitih interesa treće strane.

Odluka tuženog organa, prema mišljenju ovog suda, je pravilna i zasnovana na zakonu.

Odredbama člana 1. stav 1. Zakona o Pravobranilaštvu Republike Srpske („Službeni glasnik“ RS broj: 16/05-78/11) je propisano, da je Pravobranilaštvo RS samostalan organ koji u postupku pred sudovima i nadležnim organima preduzima pravna sredstva radi zaštite imovinskih prava i interesa Republike Srpske, grada, opštine i njihovih organa i organizacija, te drugih organa i organizacija koje nemaju svojstvo pravnog lica i nisu upisani u sudski registar, a finansiraju se iz budžeta Republike Srpske. Članom 10. Zakona o Pravobranilaštvu RS također je propisano, da su organi, organizacije, preduzeća i druga pravna lica, dužna dostavljati obavještenja o ugrožavanju i narušavanju ili osporavanju prava i stvari u svojini subjekta iz člana 1. navedenog zakona, a stavom 2. navedenog člana je propisano, da su organi i pravna lica dužni, na zahtjev Pravobranilaštva, dostaviti podatke, obavještenja i spise, kao i stručno mišljenje koji su potrebni za preduzimanje radnji iz njegove nadležnosti. Istovremeno je članom 17. stav 2. Zakona o zaštiti ličnih podataka („Službeni glasnik BiH“ broj 49/06 do 89/11) propisano, da je kontrolor ličnih podataka ovlašten lične podatke dati na korištenje treće strani na osnovu pisanog zahtjeva treće strane, ako je to potrebno radi obavljanja poslova u okviru zakonom utvrđene nadležnosti treće strane ili ostvarivanja zakonitih interesa treće strane.

Iz stanja spisa proizilazi, da je pred Opštinskim sudom u Kalesiji pokrenut izvršni postupak radi naplate troškova sudskega postupka, te da je Pravobranilaštvo RS, kao zakonski zastupnik organa, po čijem je prijedlogu i vođen izvršni postupak, radi

naplate svojih troškova predložilo novo sredstvo izvršenja i to zapljenom novčanih sredstava tužiteljice, uz prethodno pribavljanje podatka o zaposlenju tužiteljice.

Naime, radi se o zakonskom ovlaštenju za ovakvo postupanje, koje se zasniva na ovlaštenju Pravobranilaštva RS iz člana 10. stav 2. Zakona o Pravobranilaštvu RS da prikupi i koristi određeni podatak i obavezi kontrolora podatka iz člana 17. stav 2. Zakona o zaštiti ličnih podataka da, na osnovu pisanih zahtjeva treće strane, ako je to potrebno radi obavljanja poslova u okviru zakonom utvrđene nadležnosti treće strane ili ostvarivanja zakonitih interesa treće strane, podatke koje obrađuje preda na korištenje trećoj strani, u konkretnoj situaciji Pravobranilaštvu RS.

Pri tome, neosnovano se tužiteljica poziva na odredbe Zakona o poreznoj upravi Federacije BiH, koje se odnose na poresku tajnu. Ovom odredbom je jasno definisan pojam porezne tajne, kao i to kome se porezne informacije i podaci koji predstavljaju poreznu tajnu mogu dati i bez saglasnosti nosioca tih podataka. Dakle, citirana odredba propisuje i da se navedeni podaci, koji predstavljaju poresku tajnu, mogu, i to bez saglasnosti, dostaviti i izvršnim i zakonodavnim, kao i organima uprave i upravnim organizacijama. Dakle, po shvatanju ovog sudskog vijeća, u konkretnom slučaju, nije došlo do povrede Zakona o poreskoj upravi FBiH, niti pogrešne primjene materijalnog prava, iz razloga što je Pravobranilaštvo RS postupalo u okviru svojih nadležnosti i ovlaštenja i na zakonom propisani način pribavilo lične podatke, u situaciji kada nije propisano prethodno pribavljanje saglasnosti nosioca podatka, za korištenje tim podatkom.

Valja ukazati, da ni Zakon o zaštiti ličnih podataka, ni Zakon o slobodi pristupa informacijama BIH („Službeni glasnik BiH“ broj: 49/06 do 89/11), nijednim članom ne promovišu apsolutnu zaštitu bilo kojeg ličnog podatka, nego propisuju uslove pod kojim se može udovoljiti, odnosno, uslove pod kojim se može ograničiti pristup određenim podacima. Tako je odredbom člana 6. stav 1. tačka a) Zakona o zaštiti ličnih podataka propisano, da kontrolor može obradivati lične podatke bez saglasnosti nosioca podataka, ukoliko se obrada ličnih podataka vrši u skladu sa zakonom ili je obrada neophodna da bi se ispunile nadležnosti utvrđene zakonom.

Istovremeno, Zakonom o slobodi pristupa informacijama i to članom 1. stav. 1. tačka b) je propisano, da je cilj ovog zakona da ustanovi da svako fizičko ili pravno lice ima pravo pristupa informacijama u najvećoj mogućoj mjeri, u skladu sa javnim interesom, te da javni organi imaju odgovarajuću obavezu da objave te informacije. Imajući u vidu interes Pravobranilaštva RS i činjenicu da je Poreska ispostava Tuzla, kao i svaki drugi javni organ, obvezan da zahtjev treće strane za pristup ličnim podacima cjeni u skladu sa Zakonom o zaštiti ličnih podataka, te da dozvoli pristup podacima, ukoliko je takav zahtjev zasnovan na zakonitom i opravdanom osnovu. Evidentno je, da je u konkretnom slučaju takav i bio zahtjev Pravobranilaštva RS, jer je podnesen u cilju namirenja troškova prouzrokovanih u toku izvršnog postupka, koji se vodi protiv tužiteljice, kao izvršenika.

Na osnovu izloženog, ovaj sud nalazi da je osporeno rješenje pravilno i zakonito, zbog čega je primjenom člana 37. stav 1. i 2. Zakona o upravnim sporovima BiH, odlučio kao u dispozitivu ove presude.

ZAPISNIČAR
Stanka Ćeklić



3